



# Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 8



Tim Walz-i Democratic VP nomination agizükogo



German goalkeeper Neuer international asaya nungi anenogo

VOL. XXI ISSUE NO. 310 (ADOK 310)

DIMAPUR

ROGONÜ (FRIDAY)

LUROI (AUGUST) 23, 2024

₹ 5.00

## Sorkari Nagaland Communitisation of Public Institution and Services Act repsangshitsü

**Kohima, Luroi/August 22 (TYO):** Nagaland sorkari Power sector nung tali rangloker Nagaland Communitisation of Public Institutions and Services Act of 2002 repringshitsü sentong lir. Iba telemtetba ya Brehostibarnü Nagaland Civil Secretariat, Kohima nung Cabinet senden ka amendang agia liasü.

Minister, Power and Parliamentary Affairs aser state sorkar indang odongtar K.G. Kenye-i iba Cabinet senden temer osangbener den jembidang, tang yimsüing ketdangsur nem single-point metering yimya amshia power atsükba sen ketdangsur nunglokja aliba communitisation system yagi talisa urban aser suburban tesemtem nung

aginüba ama results monguteter, ta ashi.

Iba system ya urban aser suburban tesemtem nung kanga mejungi tamakok ajurua lir, aser sorkari takoksa ajuruba asadanger aruyaa aliba Assembly nung yimsüingtem nung mokongshie iba Act lepa repringshitsü, ta Minister Kenye-i ashi.

Kasa senden nung Public Health Engineering Department (PHED) aser Power Department kübok Grade III aser IV staff atema service rules yanglutsü atema jembia liasü.

Kanga junga asadanga sülen sorkari field staff workers taginüba aser metokmeperi bentetsü asoshi temelenshi kar yanglutsü tebilemba lir, koba ajanga sorkar inyakyim tajungba akumtsü, ta pai ashi.

## Resident Doctors' Associations longkak aitba anener

**New Delhi, Luroi/August 22 (Agencies):** All India Institute of Medical Sciences (AIIMS) aser Dr. Ram Manohar Lohia Hospital indang Resident Doctors' Associations (RDA) ajanga longkak aitba anenogo.

Supreme Court ajanga ayongzükba aser totuyuba agütsüba sülen iba telemtetba ya agi.

AIIMS indang RDA sangdong ka nung, RG Kar Medical College nung atalokba indang süoki ia agizüka aser linük tesem ajunga nung healthcare workers tem kumzükba ayutsü asoshi Supreme Court-i jembiba atema pelaba lemsateper, ta ashi.

Item tebilemstü kanga junga

aser tasü ita bentetsü atema National Task Force tentetba atema Association-i tenüingsang agüja liasü.

Onoki süoki ia bilemba Supreme Court-i angatetba yong longkak aitba anena atatsü telemtetba agiogo, ta RML Hospital indang RDA-ia sangdong ka nung ashi.

Kolkata nung aliba RG Kar Medical College and Hospital nung trainee doctor ka dak tim masüba mapa inyaka tepsetba, healthcare professionals tem kumzükba ayutsü aser timtem ajurur alir nem ochi obendang agüjang ta takhangba agüja resident doctor tem longkak aita liasü.

## State nung Startup Ecosystem atema lenmang bushir

**Kohima, Luroi/August 22 (TYO):** Entrepreneurship tsütsü international jenjang nung dangar den teka amteper inyaksü asoshi tongtipang mera ka agia StartUp Nagaland-i Department of Industries & Commerce den lungjemer Brehostibarnü Innovation & Incubation Space (IIS), Kohima nung sensaksemba sentong ka ayongzükba liasü.

Iba sentong ya ajanga Austrian Embassy nungi ketdangsurtem, sorkar nungi teshimtet nisungtem, industry stakeholders aser local startups tem lungjemdakja Nagaland indang startup ecosystem tajungba kuma melenshitsü atema lungjemer inyaksü lenmang bushitepa liasü.

Iba sentong nung Austrian Embassy's Commercial Section

nung Head of Technology and Innovation, Ajay Singh aser Advisor on Organizational Matters at Vantage Info, Arun Verma na dena liasü.

Senden nungsa Shanavas, IAS, Secretary, Department of Industries & Commerce, Government of Nagaland; P. Tokugha Sema, Director, Department of Industries & Commerce aser Department of Information Technology & Communication (IT&C), Investment & Development Authority of Nagaland (IDAN), Software Technology Parks of India (STPI), BAN densema stakeholders balala nungi teshimtet nisungtem aser state-empanelled incubators pongu: YouthNet Incubation Center, Educentre School of Business,

## NLTP Act ya lepa repringshitsü mapang tongogo: K.G. Kenye

**Kohima, Luroi/August 22 (TYO):** Nagaland Cabinet-i Nagaland Liquor Total Prohibition (NLTP) Act, 1989 ya shilem kar agientsü amai shiogo aser iba onük ya Nagaland Legislative Assembly indang Monsoon Session nung jembitsü amai lir.

Brehostibarnü Nagaland Secretariat, Kohima nung Chief Minister indang Office Chamber nung Cabinet senden ka amenba sülen osangbener tem den jembidang Minister, Power aser state spokesperson K.G. Kenye-i iba osang ya metetdaksü.

Mapa teinyaksü jenti lir, kong department, police aser lokti balalai ozüing tesashi yanglutsü nungdaker, ta Minister K.G. Kenye-i ashi.

"Tesem kar nung onoki iba Act tera agientsü merangtsü. Ibaji mapa kuma inyaksü atema department ajanga sentong tejangja yanglutsü," ta ashi.

Cabinet-i iba ken o lepa repringshitsü mapang tongogo ta jembi aser züngsem timbai jembiba nung ajemdaker



K.G. Kenye

amendments kar atema Assembly session nung jembitsü akok, ta Kenye-i metetdaksü.

NLTP Act aliba mechi state nung revenue tsütsü tebilemstü aliba indang pai lemsateper aser tebilemstü tulutibaji ano talisa lanurtem indang health ya lir, ta ashi.

"Taziökba makai state-i yi aitba aser yi indang quality tendangtsü department mali asünung, nurburtem asoshi lendong tulu kumogo," ta pai ashi.

Sorkari 'spurious liquor' aitba metetsü asoshi tajungtiba nung inyaka arur aser lenirtem densema nisung ajaki yi tamajung

ajanga nisung takum raksaja lokti menentsüba atema süoki ia bilemer.

Yi ajanga timtem agütsüba angateta Arogo balalai tajungtiba nung inyakaka Arogo-ia nurburtem iba amala mapa meinyaksü asoshi shisatsü peria magütsür, ta Minister Kenye-i ashi.

Alima tesem ajungalen Khristanpur aliba state aser linük tem nung yi nokdangtsü kanga merang saka otsü kasa dang, tamakok ajuru aser Nagaland ya kasaji lir, ta ashi.

"Asenok ya Khristan state ka lir aser iba atema asenok numa atanger, saka tensa mapang melenshia aoba ama tanü tendak tim masüba mapa asenoki ajurutsüla. Linük aser alima nung danga state tem ama asenok ya 'free democratic liberal' state ka lir. Anungji asenoki tangatetba ka len nungi dang state nung yimsü mesütetsü," ta pai ashi.

Nagaland Assembly indang Monsoon Session ya August 27-29, 2024 anogotem agitsü lir.

## Department dak Medical Officer shimtsü tashi mali: NVCO

**Dimapur, Luroi/August 22 (TYO):** Department of Health and Family Welfare ajanga Class 1 Gazetted Medical Officers atema 'Special Recruitment Drive' asoshi doctor 98 kisung jaokba Nagaland Medical Students Association (NMSA) ajanga anema nokdakba bhukumer, ta Nagaland Voluntary Consumers' Organisation (NVCO) sangdong ka ajanga ashi.

Department of Health and Family Welfare ajanga August 20, 2024 nü sangdong ka nung Class 1 Gazetted Medical Officers atema 'Special Recruitment Drive' asoshi doctors 98 kisung

jaoka August 26, 2024 nü departmental examination agia August 27 & 28, 2024 anogotem viva voice agitsü shia liasü.

Class 1 Gazetted Medical Officer post atema department-i iba ama tatidang agitsü ya tashi mali aser ozüing agi memelar, ta NVCO sangdong ajanga ashi.

Ibai 'favouritism, nepotism' aser ochimashi mapa tejangja lir ta NVCO-i ashi aser department-i kechiba iba amala aibelen inyaken inyaker ta asüingdanga liasü.

Temsüa aliba candidates ajunga nem maongka kasa agüja NPSC-i tatidang agitsüla.

State kübok office mashi

nung employment mesüra appointment dak sendakba nung senso ajunga nung maongka kasa agütsütsü ta Constitution of India indang Article 16 nung shia lir, ta NVCO tir Kezhokhoto Savi-i sangdong ajanga ashi.

Government of Nagaland kübok department ajungai post tazüing aliba ya Nagaland Public Service Commission (NPSC) nem agütsütsüla, aser yangji Medical Officer aser backdoor appointment ajanga agir aliba tem dena lir.

Supreme Court of India-ia backdoor appointment ya tesempatsü mapa ta shia lir.

(Maneni tapak 2 nung...)

NEILIT, NTTC, aser Nagabots den StartUps and Entrepreneurs nungi dena liasü.

P. Tokugha Sema-i pela agizükba o jembia senden tenzük aser iba sülen Shanavas, IAS ajanga Nagaland nung startup ecosystem anitetsü asoshi international partnerships indang jembia liasü.

Pai jembiba onük nung ajemdaker sensaksem kaa liasü, kong entrepreneurial environment balala adokdaksütsü asoshi state-i temulung agüja inyakba indang lemsateper.

Iba senden nung Austria nungi arur tem nema parnok tangatetba lemsateptsü mapang agütsü. Ajay Singh aser Arun Verma nati innovation, technology exchange aser capacity building atema teimla aliba indang lemsateper aser

local startups aintsü atema Austrian expertise aser resources amshitsü indang lenmang tem sayua liasü.

Local startups dang parnok indang innovative business models aser osettsüset parnoki yanglutetba sayutsü jaoka shisa lemsateptsü aser külemi lungjemer inyaksü asoshi teimla aliba jangjatsü maongka tajung agütsü.

Iba sentong nung shilem agirtem tsüingta sadoksayima aser temulung ajak rapkoka sensaksemba liasü aser tarutsü nung lungjemer inyaksü, sentong balala nung lenmang sayutsü aser market access asoshi jembia liasü.

Iba sentong nung shilem agirtemi tarutsü nung Nagaland indang startup ecosystem asoshi teimla lemsateper aser Austrian

ketdangsur temia state-i meranga inyakba ngua tenüingsang agüja liasü.

Northeast India nung entrepreneurial ecosystem jangjatetsü nükjidong nung fact-finding mission shilem ka ama Austrian Embassy indang Commercial Section-i Nagaland semdangba mapang ka lir.

Iba mission yagi region nung rongsenketzüng aintsü, lungjemer inyaksü aser maparen tasen shisateta inyaksü atema sapang tajung jangjatetsü asoshi rangloker senzür.

Nagaland nung parnoki Department of Industries & Commerce, StartUp Nagaland densema tongtipang stakeholders tem den ajurutepa sensaksemba state nung tayongzükba aser maongka angatetsü meranger.



# Aadhaar MBU dak sedakba nung senden amen



ADC Dimapur lensüba nung senden amenba mapang tangokba noksa nung angur.

**Dimapur, Luroi/August 22 (TYO):** Kaketshirtem atema Aadhaar Mandatory Biometric Update (MBU) dak sendakba nung ADC Dimapur, Zakabo V. Rotokha lenisüba nung August 21 nü DC indang conference hall, Dimapur nung senden ka menogo.

Senden nung Mandatory Biometric Update inyakyim benoka inyaksü atema September ita mezüngbuba hopta school tem nung Aadhaar camp tem amenoktsü telemteba agia liasü. Biometric Update ya arishi

küm 5 nungi 7 aser 15 nungi 17 tsüingda alirtem atema asütsü.

Iba dak sendakba nung ADC Dimapur-i, Aadhaar holder aser talisa kaketshirtem tetsükdaktsü kecha matoktsü atema Aadhaar Biometric update exercise mapang teka amteper inyaksü atema school administrators dang mepeshia metetdaktsüogo, kechiyong iba sentong tamakok ngura Aadhaar tem de-activate sütsütsü akok aser authentication inyakyim nung tamakok alutsü.

Senden nunnga kaketshirtem kwi ali iba dak ajemdaker school

ana asem lokteper iba inyakyim benoka inyaksü sensaksema liasü.

Iba senden nung DEO, DPRO, All Nagaland Private School Association Dimapur Unit, Nagaland School Alliance aser Dimapur district administration-i shilem agia liasü.

Temetetsü kaji Unique Identification Authority of India-i, DC aser DEO tem dang parnok tawabangba kübok aliba tesemtem nung Aadhaar Biometric Update agütsü tetuyuba agütsüogo.

# Assam nung sen lakh 80 mashiyimi amshiba atema college principal ka aitsü

**Guwahati, Luroi/August 22 (Agencies):** Dhubri, Assam nung Hamidabad College principal-i college indang sen lakh 60 nungi 80 tashi mashiyimi amshiba atema aitsüogo

Principal Shahadot Ali-i, terenlok maparen balala dak atemer college indang rongsen mashiyimi amshiba atema temulung melemi bilemer.

Chief Minister indang

Special Vigilance Cell-i, ken o ashishitsü atema college staff tem jaokogo, saka tang tashi telangzüba agüja mali, ta sangdong ka ajanga metetdaktsü.

Osang ajanga ashiba agi, pai osütsüt balala aliba atema bill taila yanglua amshi aser kasa mapang nung senotsütem ya tangalen amshia liasü.

SVC-isa, senotsü tsütatepba

nung densema aliba company kiburtema jaokogo.

Kasa mapang nung iba ochi mashi ken o nung college management committee-a densema alitsü ta temulung melemi bilemer.

2024 küm January ita principal'er ki meita aoba mapang college dak sendakba nung tashishitsü aketba kuli kaketem ngua liasü

# C-Edge College nung World Entrepreneurs Day mungogo



C-Edge College nung "Celebrating Groundbreakers Who Transform Ideas into Reality" omen nung ajemdaker World Entrepreneurs Day 2024 amungba mapang kaketshirtem, faculty aser tejaokertem tangokba noksa nung angur.

**Dimapur, Luroi/August 22 (TYO):** C-Edge College kübok Department of Management Studies-i ayongzüka August 21 nü "Celebrating Groundbreakers Who Transform Ideas into Reality" omen nung ajemdaker World Entrepreneurs Day 2024 mungogo.

Iba sentong ya entrepreneurs tem nem tenüngsang agütsütsü aser kaketshirtem mulung nung innovative aser entrepreneurial mindset ka inoktsütsü nükjidong nung ayongzüka agiogo. Sentong ya GK Auditorium nung agi, kong session aser sensaksem sentong balala agia liasü.

Iba sentong ya BBA V Semester nung azünger Tunavi Swu lenisüba nung agi aser BBA 3rd Semester nung azünger aser EU züngsem Chaam-i sarasadema liasü.

Sentong ya HoD aser Dean of Management Studies

Wapanginla Ao-i okila jembir tenzüik aser iba sülen Thejasikho Vakha (BBA V Semester) lenisüba nung Kaki Marketing team den sensaksem sentong ka agia liasü. Managing Director, Kakivi Chishi-i anir Kaki Marketing team-i tanü asüng shishilembaba yimya aser tasatem indang tangazükba agüja liasü.

Kasa anogo Educentre Business School and Department of Industries and Commerce, Government of Nagaland den longjemer C-Edge College nung Entrepreneurship Development Centre (EDC) amenokba sangdonga liasü. EDC Coordinator and Social Media Manager of Educentre, Incale Iswarang-i, EDC indang metetdakja liasü.

Maneni Department of

Management Studies, Assistant Professor Shiva Prasad Dey-i, business venture tetoktepba takok nung tembangba indang metetdaktsü. Iba tetoktepba ya Hito Assumi, Akivipu, Sneha, Ningthuilu aser Imnamongla (BBA I Semester) nunger indang team Hains Enterprise-i koka liasü.

Taküm iba sentong nung University Level Merit Award agüja liasü. Award tem ya C-Edge College Principal Chubatola Aier-i agütsü, kong Laurel Merit Award for students & departments, Balakrishnan Ramanathan Award for EVS Topper aser Viwhesieno (Tsuno) Award for Girls Topper naroküm agüja liasü.

Sentong ya Department of Management Studies Assistant Professor Seema Debnath-i tepela o jembir tembanga liasü.

# ADC Kohima-i JNV selection tatidang indang metetdaktsü

**Dimapur, Luroi/August 22 (Agencies):** Additional Deputy Commissioner Kohima, Rhothietho Nguori-i sangdong ka ajanga, Class-VI atema 2025-2026 session asoshi Jawahar Navodaya

Vidyalaya, Kohima Selection tatidang April 12 nü agütsü ta metetdaktsüogo.

Online application benoktsü atema tatembangbuba anogoji September 16 nü asütsü, ta kasa sangdong ajanga metetdaktsü.

# Manipur: Congress-i "Adani scam" anema longkak ait

**Imphal, Luroi/August 22 (Agencies):** Manipur Pradesh Congress Committee (MPCC)-i ayongzüka Imphal nung, "MODANI Mega Scam" Joint Parliamentary Committee (JPC) nem bushisüngdangdaktsütsü aser SEBI mendenbula tangsa tang mapa nungi anendaktsütsü khanga longkak aita liasü.

MPCC tir aser MLA K Meghachandra-i, Ato Kilonser-i Adani aser SEBI mendenbula kümzüka ayuba atema atema ashishi aser ashiba agi, parnok tsüingda tesendaktep aliba ajanga linük rongsenketzüng yirutsür.

US short-seller Hindenburg Research ajanga SEBI mendenbula Madhabi Puri Buch aser kinungbo na ochi mashi inyakyim nung densema aliba temai adokdaktsüba dak ajemdaker iba longkak aita sentong ayongzüka liasü. Iba report nung Adani Group den

sendaka aliba offshore entities tem nung tena indang stake mesangdongi aliba indang metetdakja lir.

Longkak aiteremi Adani inyakyim ya JPC nem bushisüngdangdaktsütsü ahangba den SEBI mendenbula tangsa tang mapa nungi anendaktsütsü khanga liasü.

Manipur Legislative Assembly nung opposition tongtiba Congress party-i, JPC nem ken o bushisüngdang mesüdaktsüba atema Modi-i aniba sorkar aitsü aser Ato Kilonser aser Adani na tsüingda meim tesendaktep alitsü ta temulung melemi bilemba lemsatepa liasü.

Adani groups atema sen crore 20,000 intokba indang longkak aiteremi telangzüba meshi aser iba inyakyim anema tangsa tang jenjang agütsü takhangba agüja liasü.

# Department dak Medical Officer... (TAPAK 1 NUNGI...)

Backdoor inyakyim nung takok ngua mapai aitba ajanga temeden kecha magütsür aser parnok mapa regular kumtsüba ajanga Constitution of India indang Article 14 & 16 nung shia maliba ama inyaker asütsü aser Cabinet-i Article 162 nung agüja aliba tashi amshia telemteba agiaka iba ama regularisation ya agientsütsü tashi lir, ta NVCO sangdong ajanga ashi.

Backdoor appointment anema raraba ya Indian Constitution indang Article 16 nung nübur ajunga nem employment tsütsü temeden kasa wazüka yuja aliba

ochi obendang angütsü mechi lir, kechiaser zünger temsüa lir mapa mangur lanur aika iba maongka magiteter, ta ashi.

Madras High Court densema High Courts aikati state sorkar dang sorkar mapa nung backdoor appointment tem regular kumtsüba anentsü shia lir.

Anungji Department of Health & Family Welfare ajanga Medical Officer post atema departmental exam agütsüba ya backdoor appointment den sako lir, kechiaser ibai department tashi kübok mali, ta NVCO sangdong ajangasa ashi.

# Kiphire nung non-residential training sentong ka agi



Kiphire nung Importance of Fishery dak sendakba nung training sentong ka agiba mapang tangokba noksa nung angur.

**Dimapur, Luroi/August 22 (TYO):** Department of Fisheries & Aquatic Resources, Kiphire aser NSRLM, Kiphire na longjemer August 19 nungi 21 tashi importance of fishery by - products, fish consumption & process of making value-added products dak sendakba nung anogo asem atema non-residential training sentong ka ayongzüka agiogo.

Ajak senteper district kübok SHG balala nungi trainee 25-i shilem agi, kong shisalen sayurji

Esther liasü. District Fishery Officer, Kiphire Nzanthung T.Yanthan-i, Kiphire District nung value-added products koda tongtibang iba indang tangazükba agütsüba atema District Project Officer, Kiphire, Lipichem aser District Horticulture Officer, Kiphire, Sentinungba Longchar na dang kanga pelaba lemsatepa liasü.

Sentong ya delegate aser shisalen sayuri trainee tem nem kuli kaket agütsüba sülen tembanga liasü.



# PM Narendra Modi-i Poland PM Donald Tusk den senden amen



August 22, 2024 nü Poland yimtiba, Warsaw nung Ato kilonser, Narendra Modi agizükdang tangokba noksa nung angur. Kasa noksa nung Poland Ato kilonser, Donald Tusk-a aser India External Affairs Minister, S Jaishankar nata angur.

**New Delhi, August 22 (Agencies):** Brihostibarnü Poland yimtiba, Warsaw nung Ato kilonser Narendra Modi-i Poland Ato kilonser, Donald Tusk den senden amen.

Modi-isa Poland Tir, Andrzej Sebastian Duda den-a senden menogo.

Bodhbarnü Ato kilonser Modi Delhi nungi apusoa Warsaw tonga oa liasü aser Hokolbarnü pai Ukraine linüka semdangtsü.

Ukraine Tir Volodymyr Zelensky-i jaokba nung ajemdaker Modi-i Ukraine

sendangtsü, aser ibaji tesüiba küm 45 tsüngda India nunger Ato kilonser kati tang mezüng Ukraine semdang asütsü.

Modi-i, "Ni tamalen Tir Zelensky den linük ana tesendaktep tajungba akümtsü atema jembiba sülen maneni iba onük jembitsü atema maongka angutsü yongyar aser tang Ukraine nung rara anentsü atema tebilemba onüktem-a lemsateptsü," ta metetdaksü.

Bodhbar nikongdang Poland nung Modi-i Jam Saheb of Nawanagar Memorial semdanga asür nem akhüm

agüja liasü. Poland nung Jam Saheb dang 'Good Maharaja' ta ajar. Jam Saheb-i akhidang Soviet Union nungi jena arur Poland nunger tanur 1,000 dak atema jenokdakja liasü.

Maharashtra nung Kolhapur jila anasa aliba Valivade yimdak Poland nunger 5,000 shi mapa inyaka küm aika aliba sülen pei limai meyipa ao.

Parnok teimbaka Second World War mapang Poland nunger camp nungi aienshidakja gari lenmang mesüra tzüyim ajanga India-i arua liasü.

# J&K assembly election atema NC-i Congress den longjemer

**New Delhi, August 22 (Agencies):** Brihostibarnü National Conference (NC) lenir aser taoba mapang Jammu & Kashmir nung chief minister, Farooq Abdullah-i taruba assembly election atema National Conference aser Congress na longjemer, ta metetdaksü.

Brihostibarnü Congress lenir Rahul Gandhi aser Congress Tir, Mallikarjun Kharge nati Farooq'er kidang pa ajurua senden amenba sülen pai iba osang ya metetdaksü.

September 18 nungi Jammu & Kashmir nung election tenzüksü lia National Conference-i Congress aser CPI(M) na den longjemba metetdaksür.

Congress lenir Rahul Gandhi aser Congress Tir Mallikarjun Kharge nati Srinagar nung Dr. Farooq Abdullah ajuruba sülen tena Jammu-i ao. Rahul-i anogo ananü J&K semdang.

Farooq'er kidang amenba

senden nungi par jabaso aser taoba mapang Chief Minister Omar Abdullah den party lenirtema aika liasü.

Rahul Gandhi Jammu-i apusoa aoba sülen mapang tatsüka tsüngda osangbenertem den jembidang National Conference Tir, Farooq Abdullah-i, "Assembly menden 90 prongla nung party ana lokteper tokteptsü. Paperwork taonungsa tembangtsü. Congress, NC aser CPI(M) longjemer tokteptsü. Onoki state jenjang tanaben angutsü ta imlar. Ajak asoshi onok kishi lapokja dang lir," ta metetdaksü.

Lok Sabha nung Opposition lenir, Rahul Gandhi-i, "Tekeraba nung Jammu & Kashmir nem state jenjang tanaben agütsütsü onok atema tongtibangtiba asütsü. Election magidang state jenjang angutsü onoki imlaa liasü. State jenjang tanaben agütsütsü ta onoki amanger. Linük nüchiso anguba sülen

state ka jenjang ajemja union territory kümtsüogo. Parnok nem democratic temeden agütsütsü onok atema tongtibangtiba asütsü. Congress Party-i Jammu & Kashmir aser Ladakh nüburtem nungiter," ta metetdaksü.

Congress Tir, Malikaarjun Kharge-ia, onoki opposition ajak longjema lidaktsüner, ta ashi.

Kharge-isa, "J&K nung election agitsü atema BJP-i meinyak, Supreme Court-i tuyuba sülen ang BJP-i election agitsü sangdonga liasü. BJP-i joko J&K nung nüburtem ola menembangtsütetsü. Congress-i J&K nung nüburtem atema inyaktsü. BJP-i Arrla 370 agienba sülenbo J&K nung kiralongra samatsüogo ta jembir, ajisüaka ibaji tiyazü ta metetogo," ta metetdaksü.

Jammu & Kashmir nung assembly election September 18 nungi tenzüka shilem asem lemsar agitsü aser October 4 nü election osang sangdongtsü.



## OFFICE OF THE AO SENDEN

"Sabur Asoshi" (For the People)

### AYIMOKTSÜR

Ao Senden ajanga Aor sobaliba aser senso temeden wazüka ayutsü asoshi Ao senso ajak dangi tamalen nungi metetdakja aruba, maneni lepschia ayimoktsür.

1. Tzümalongmar (non-local) bener arua mesüba (adopted child), aser,
2. Aotsür tzümalongmar (non-local) den kibalembuba chirnurtem shinga nema Aor senso temeden kecha magütsütsü.

Anungji, item nisungtem nem Aor senso tenüng jatsütsü makok. Tongtipangsa senso temeden zülü kuli kakettem Birth Certificate, Schedule Tribe aser Indigenous Certificate tem, School Commulative Record aser koba kaket kulitem ajanga Ao senso kümdaktsür, item kuli kakettem magütsütsü asoshi metetdaksür. Shiri item temzüngozüng raksadir aser masüba nisung nem Aor tenüng jatsüdir aser iba den kin kidong agütsür alir, lendong timtem ajurudangbo ozü senso masü ta sangdongdir Aor sobaliba nung ajemdaker tapet temerenshi alitsü.

Sd/-  
(MARSANEN IMSONG)  
President

Sd/-  
(IMTIPOKYIM)  
Gen. Secretary

## Tsüraburi jabaso südaktsütsü mepishiba Supreme Court-i magizük

**New Delhi, August 22 (Agencies):** Tsüraburi par jabaso ka tesüiba küm 11 tashi timtemba joko marenteti joko südaktsütsü atema Supreme Court dang mepishi, saka court-i magizük.

Doctor temia arrshi küm 30 tebursangji maneptsü, ta shiogo.

Tsürabur jagi Supreme Court dang par jabaso nem chiyungtsü agütsüba 'Ryles tube' ji joko agienadoktsü atema telemetba agitsü asoshi medical board ka tentetang, ta mepishi.

'Ryles tube' ya teni ajanga tebok tashi yoker shiranger nem chiyungtsü aser mozü naprongla chidaktsüba tube ka lir.

Ajisüaka Supreme Court-i, "Ryles tube agienadokbaji 'passive euthanasia' masü. Ryles tube ji agienadokra shirangerji yaseta süadoktsü. Ryles tube yabo life support system ka masü," ta metetdaksü.

Tsürabur ana- arrshi küm 62, Ashok Rana aser pa kinüngtsü Nirmala Devi (55) nati par jabaso kümzüksü atema kanga merangogo. Par jabasoji tekolak kanga mejungi yiruba sülen temang tenük-telen kecha marakzüteti aküm. Par jabasoji Mohali (Punjab) nung civil engineering tagidak mapang ki tamentep pezübuba nungi tsüka yirua liasü.

Tsüraburisa SC bench - Chief Justice D Y Chandrachud den

Justices- J B Pardiwala aser Manoj Misra nunger dang, par jabaso medical treatment atema 2021 küm par ki tangar dang ayok aser tang pa pension itasen ishikati kibong-a memesüteri kümogo, ta metetdakja liasü.

Tsüraburtem tesüiba küm ter dak tali kanga timtema aruba aser parnoki rizüngba rongsen ajak indokmabaji meteta Supreme Court-i additional solicitor general, Aishwarya Bhati dang teyari agütsütetsüsa lenmang kar danga ali nunga Centre sorkar den jembiang, ta tuyu.

Chief Justice, D Y Chandrachud-i additional solicitor general dang, "Iba ken o ya kanga tasak. Tsüraburtemji tesüiba küm 13 tashi kanga timtema aruogo aser tangbo parnoki par jabaso treatment agiba bill-a magütsüteti kümogo. Anungji institution kari danga shirangerji anepalutetsüsa ali nunga lenmang bushiang. Onoki 'passive euthanasia' ji memelatsü, kechiyong shiranger nem Ryles tube ajanga chiyungtsü agütsüyonga ibaji life support system agir masü," ta metetdaksü.

Ajioda additional solicitor general, Bhati-i Supreme Court bench dang, "Ni Union health ministry den jembiba sülen nenok nem telangzüba agütsüdi," ta metetdaksü.

## Artsülen longkak aiter aluyimertemi Highway lapoktsütsü melungogo

**New Delhi, August 22 (Agencies):** Brihostibarnü Punjab state sorkari Supreme Court dang, August 12 nü court-i agütsüba tetuyuba nung ajemdaker sorkari Shambhu arrtsülen longkak aiter aluyimertem den senden ka menogo, aser aluyimertemi mokdanga aliba highway tera lapoktsütsü melungogo, ta metetdaksü.

August 12 nü Supreme Court-i Punjab sorkar dang taküm February 13 nungi tenzüka Shambhu arrtsü nung longkak aiterem dang highway mokdanga aliba tractors agientsü atema mepishiang, kechiyong

highways ji gari anena ayuba tesem masü, ta metetdakja liasü.

Brihostibarnü Supreme Court-i, aluyimertem tebilemstü onüktem bentetsütsü atema SC-i tekeraba nung multi-member committee ka tentetsü, ta metetdaksü.

Justice Surya Kant, Justice Dipankar Datta aser Justice Ujjal Bhuyan nungeri akümbe bench-i maneni September 2 nü kasa ken o angadangtsü.

SC-isa Punjab aser Haryana state sorkartem dang aluyimertem dak sendakba tebilemstü onüktem multi-member committee nemji agüjang, ta tuyu.



August 22, 2024 nü Srinagar nung Congress party nung inyakerem senden nung party lenir, Rahul Gandhi-i jembidang tangokba noksa nung angur.





## TIR YIMYIM YIMOBILEM (EDITORIAL)

DIMAPUR ROGONÜ, AUGUST (LUROI) 23, 2024

### Tanübo tajung ana !

**T**ejashi, tamajung aser temulung masüba indang dang anogo shia amato iba yimobilem nung lemsatepa arur, tanübo asen lima nung atalokba tajung aika rongnung ana reprangteta lemsatepner. Kaji, tawa NSCN telok kati Angami nunger contractor ka taküm amokmerenba anema Ao Sendeni anir Aor lanurtemi ola adokba to ka asütsü. Asenok Naga nunger aser Aor yimya agi, tajung asüyonga, tamajung asüyonga asen yimer, asen tzükong pur aser asen kin dak atalok ka mesüra tangar dak tamajung atalokba agi asenok balaka mejashir aser tajung atalokyonga kecha balaka pelaba mesayur. Iba jagi asenok tangatetba ya asen ki kima tashia malur amai sayur. Aji oda, kodang asenoki asen Naga nunger dak atalokba tajung süli, tamajung süli kecha hau ta melii mangashi, mangu aser memetet amato yutsüdir, shitakba agibo, asenokji Aor memesük akümer asütsü. Ajisüaka, tangbo asenoka Aor mesüka asenoki tangar dak lendong atalokba indang shishia bilema, Naga nunger yimkong ajungtsü atema Aor chanutemi Angami nunger dak atalok ser nung pei dak atalok ama bilema nungsen aser lendonga tizükteta ola agütsüba olaji Naga nunger longjemtsü aser Naga lima yanglushitsü ayimoktsüba ola ka asütsü. Iba to asen Aor chanu ka dak atalokba agi Aortemi ola adok asübo kecha balaka mesüla aser mebilemla. Ajisüaka, tangbo Naga nunger loktiliba nung asen Ao kini mera tajung talila ka agiogo ta asenoka tejak tentet-tenteta bilemer. Iba ama ola jagi kin ka tejak angüma atudaktsür. Iba ama tanger timtem tetsübu mapang aseni ola ka agütsübaji tanüker merijang yokba danga taoba, ibaji tsürabur aküm aser kibong nung tantsü tambui tanutsür tanubur tsüba alidang tasü itdaktsüba amai lir. Atangji, tajung-tamajung metettsübaji lendong aser timtem mapangang metettsü, kechiyong mapang tajung nungbo ajak tajung, ajak tagütsünü aser ajak tasü tait amai dang asütsü. Atangji, tanü Aor lenir tajung aliba agi Naga nungertemia Aor junger ta asütsüsa sayutetogo. Tanabuba tajung kaji, tang ya Kohima aser Dimapur na tsüngda lenmang lendi anentsü agi anembanger gari ajanga mesüitet, tanga lenmanglen meküna senzür, anungji ghonda ana jajatsüba lenmang agi kodangang atongtsüar memetet nisungtem kanga timtema jajar. Aji oda, aiben gari nungtena yur moutet anogo piyong len tom nung yaa-tzüraa atar. Iba ama mapang ya nisung kar asoshibo lenmang nungji süngo aser amtsük yoka sen aatsü mapang tajung ka lir. Ajisüaka, asenoki bilemba ama masü, tangarsa awashi temetetba aser temeima taketba ta shitettsüsa, iba lenmang tilaba yagi Angami nunger yim ka tenung agi Mezoma yim ajanga süidang, yangji par among nung Mezoma nunger lanurtemi süisüponger ajak atema angati amtsük, süngo aser tzü tajemtsü tajung agütsür. Ashiko, karibo iba mapang ya sen aatsü mapang tajunga ta bilemer, par teloki süngo molua ayoktsüang apitettsüa akok mesüra ano karibo süngo dang masü saka chi dena sorua chiyongtsü ayoktsü sentongang atongtetsüa akok. Atangji, itemjia taibo masütsü saka nisung timtemba mapang angati yaritsü mulungtetba shisatsü o ayoktsü mulungtetba shisatsü naji ali o anüng na tetsüngda ait amai lir. Iba jagia kin ka tangatetba shisatsü aser temulungjang sayur. Aji oda, shirnokar memetetba bendangertem pei lushi ajanga lenmang tamajung nung timtema süidang achiajemtsü tajung angati renema agütsüba nübortem mulungjangji koda topur tajung, tenükshitsüka aser meyipa orr par yimkong dang kanga pelar ta shinütsüka bilemer. Item ama Naga nunger rongnung timtem aser lendong mapang aria bilemtep mapa agi sayuba ajanga Naga nungertem ya shitakba kibong ka chir ama longjemadoktsü. Atangji, senden aliba kija agi masü mesüra Peace aser Political Affair Committee ama shima inyakba agia masü saka Naga nunger kintemi kodang pei kin alema oagi tasü itta ochi aser mapa tajung inyaktsü tenzükdir, idangji dang Naga lima ya tangatetep aser tajung agi asüngtsü.

## OLEMSABANG

### AO OSEP TASEN

~ P. Renthly Jamir.

(Yashi adok nungi...)

Tang kanga tongtibang O ka bener arudi Ao oshi renloktsüba nung tongti shilem agir rongnung All India Radio Station Mokokchung ya ka lir. Parnoki sentong tajung aika yanglua sangtonger. Ni anogoshia iba Radio osang balala yokba angar aser tangar danga angatsü ni ajungshir. Saka Kohima Mokokchung Radio Ao osang azüngertem ya Ao oshi meteter nem züngdaktsütsüla, karibo Ammang tajung ta-a azünger, aser Aori kodanga ammang tajung ta mejembir. Ano Radio nung shilem agia inyakerkem teti anogoshi adokba osang kaketterem azünger asütsüla alima kara-a melenshir yashi to tanü masü. Yangi parnoki Ao oshi tai beleptepa azüngba kar tuteta zülur yabo yakta melenshitsu ajungshir MATAMABENSAR LEMTAMATAR iba ojang ana ya khenyongi taiteptsü mali. Ya jangjatsü rasa-a sayur.

- |                                    |                          |
|------------------------------------|--------------------------|
| i. Matamabensar (imbecile, stupid) | i. Lemtamatar (Disabled) |
| ii. Matumalem                      | ii. Talemta              |
| iii. Mazükmaro                     | iii. Shi azü meperi      |
| iv. Lembumazük                     | iv. Tenük telen mabensa  |
| v. Somatangma                      | v. Tsüngtsüklongtsüker   |
| vi. Sowasolem                      | vi. Nükpoktsükpoker      |


Tanü asüng Government-i lemtamatar asoshi sentong tapu aika yanglur aser Radio nungaji matamabensar tasa sangtonger Ao oshi nung matamabensar ya o tamajungtiba lir. Lemtamatar dang na matamabensa ta shira aji O akümtsü Mokokchung Radio Station nungi matamabensar tasür sangro ka azungba (Lemtamatar melena) angashia yabo tim masü Radio announcer ya Censorship alitsüla ta bilema aru. Tir Yim Yim zülur danga ya benteta shir nung hau tabo asür ano kar nungbo memelenshi zülur. Aser iba tai ya tanü tashi Ao osep tajung tabensa ka adoka makaba ajanga lir. Aser tanü asüng Aor Chanui Ao O mejembiteter ta jembibaji item ya lir. Ano parnoki angazüktsü meranga mebushir. Asen Ao oshiji tetezü shitak ola osü petpeta jembitsüla. Ano yamala züa jembiba ojang tongtibang ka shinür SHITETREN aser SHISANGREN. Ya shitakbaji shitetren saka aikati shisangren ta jembir zülur. Identity mapang talangka mungutepi aliba nisung ka den ajurutepdang kodanga nai ni shisanger ma? Ta mashir. Saka nai ni shiteter ma? Ta jembir shitettep metettep. Ano tanü asüng lanurtemi purapitet, purapitet ta jembir ya tetezü makaba ojang ka lir. Iba ya puratet ta asütsü aser ya O tajungren nung amshiba masü. Puratet tetezü tamakitsü khenyongi tagitsü maliba tiazü Pai puraba artisttemi oset tasen ka yanglutetba Scientist temi mapa tasen ka inyaktetba item dang ya shisatet shisadanga inyaktetba asatet asadanga inyaktet. Saka puratet ta süra kecha kuli makaba tiazü ka bilemteter jembiba dang ajar aser yamala purateta jembibaji aiben lendong ajurur ano yamala yazü purar aika aliba yim dang opok yim ta ajar. Item ojang anasemka ya aiben lephsia zülur saka memelenshir. Aser metetsümonga tai mejembidaktsünür.

Shisema aruba ama Ao oshi tesamar samatsü tsübur tabo jembir saka nai aser ni aibelena jembiba aser züluba agi aji raksar aser samadaktsür. Asenoki Aor sobaliba tajung ta Ao oshi takar ta jembir. Aser tena ya sentaktepa lir. Sobaliba samara oshi ojang tajung aika samatsü oshi samara sobalibaji maka akümtsü. Lanurtemi kiyong kinar den sobaliba tajung mesamai bentshia alitsü. Ao oshi ojang kar shisemer. Aor sobaliba nung kinarongshi ta süra ki ka nung zünger telok ka mesüra Society tentet kar Nashi Ak lepseta chira kidangsür ka mesüra ana nem shijep lepteta agütsüba dang kinarongshi ta ajar. Ano ajurushi tasüra shikar shientsür shirnoki shiruru kaseta bener adokdir lenmang nung shir tama ajurudir shi lepteta agutsüba dang Ajurushi ta ajar. Asen Ao oshi angazükdang sobaliba külemi angazükba oshi den Aor yimsütsüba angazükba, Paktem Aor tatar budget session amenba dang Ao oshi nung paktem ta ajar. Oshi aser sobaliba sentaktepa alinung asen Aor ajaki Ao oshi ojang kata mesamadaktsüi bendena inyaktsü merangtsüla. Aser tang Ao osep tasenba kodang adokdir item ajak tabensaba nung adoktsü imlaseta atadi ta shisa lemsateper.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**



## US nungi Khristan lenirtem telok kati Gaza nung rara anentsü mepishi



Gaza arrtsülen aliba Kerem Shalom crossing noksa nung angur.

**August 22, 2024:** Tawa US nungi Khristana lenirtem telok kati Gaza arrtsülen military zone ka nung longkak aita Gaza nung rara anentsü mepishiogo.

August 18, 2024 nü US nungi Khristan lenir 12 aser Palestine nung Khristan lenir asema Gaza nung rara anentsü atema takhangba agüja longkak aita Kerem Shalom crossing nung Israel nung sepaitemi parnok nokdanga liasü.

Longkak ait metenzükdang parnoki tamasa Rabbis for Human Rights aser Muslim nung yimsü lenir ka den akhidang nungi aliba Maon Synagogue nung sarasadem sentong ka agia liasü.

Yimsü balala amangertem den külemi sarasadem tagidak mapang nunga bomb aser 'siren' ola angashi, anungji sarasadem nung shilem agirtemi idangyongjisa ali nung remdaka mejanga ata.

August 16, 2024 nüa US nungi Khristan lenirtem jagi West Bank nung alirtem telok ka kümzüktü meranga liasü. Khristan lenirtem jagi Bedouin nung yim Uum Jamal semdang.

Iba yimdak alirtem jagi yim toktsür ajentsü meranger saka tsübur. Tanurtemi bomb aser injang ola angashia tetsübu nung saaktsüa liasü. Iba yimdakji sepaitemi teburtem dak azük aser tetsürtem dak tim mesüi benshi.

Khristan teloki iba yim semdanga alia mapang nung Israel nung sepaitemi parnok-a amokmeren. Ibayongji parnoki US State Department aser US Embassy dang Israel sorkar dang iba tesem nungji rara anentsü tuyuang ta mepishi.

Tang Khristan telok jagi US Tir Joe Biden aser tatong Tir, Kamala Harris na dang rara anentsü atema ajungshiba dang masü saka raraba hadir Israel dangi supply masütsüla,

ta mepishi.

Pax Christi USA nung taoba mapang chairman, Robert Shine-i, "Küm 80 jungnüa Israel-i Palestine nung anema inyaker. Nisung jenti tepsetba ya Zionist project lir aser talisa US taxpayers-i senotsü agi yarir. Iba rara ya yimsü dak sendakba rara, ta tai rateta agir. Atangji nungbo iba ya Israel-i Palestine nungertem parnok li nungi meindoktsü nükjidong nung inyaker. Yimjung jakdang Palestine nung nuchiso latettsüla, aser iba atemaji US Khristantem densema ajaki inyaktsüla," ta metetdaksü.

Village Church DC nungi Rev. Dr Lewis Tait-i, "African-American ka ama ni Palestine nungertem timtemba jenjangji angateter. Palestine pusemba tetezü Yihuda nungertem sempaba masü, saka 1947 küm nungi timtemba nüburttem atema bilemetsüba lir. Saru agütsür American senso ka ama ni Biden aser Harris administration den Congress dang nisung jenti tepsetba maparen atema senotsü teyari agütsüba anenang ta mepishir," ta metetdaksü.

Network of Evangelicals for Middle East nungi Mercy Aiken-i, "America nungertem Khristan ka ama ni temeshi lima (Israel) semdanga mapang talangka mongogo. Gaza, Occupied Palestinian Territories aser Israel nungertem jenti aliba atema ni melung raksar. Iba rara talangka manentsüsa kü linük (US) aser kü tamangba yimsü amangertem (Khristantem)-ia inyaka lir. Iba rara aser timtem teraji mangateter. Ni iba atema tatok meshir. Joko laktetogo, ayong aser tzüyim tsüngda alirtem tarutsü tia tajungba akümtsü atema süoki ia inyaktsüla," ta ashi.

Khristan lenirtem jagisa Gaza nung teti atema rara anentsü aser yimtenren tsütsü

pua tepuokdak alirtem ajak chiochtsü takhangba agütsü.

Gaza arrtsülen longkak aita rara anentsü takhangba agütsürtemji Mercy Aiken, Network of Evangelicals for the Middle East; Prof Ken Butigan, DePaul University, Catholic; the Rev Larry Clark, Methodist; the Rev Paul Jeffrey, Methodist; Prof Kelly Johnson, Catholic; Prof Eli McCarthy, Georgetown University, Catholic; the Rev John Paarlberg, Reformed Church of America; Levi Pierpont, Air Force veteran (friend of Aaron Bushnell), Quaker; Robert Shine, Pax Christi USA, Catholic; Jessica Sun, Leadership Team, Pax Christi Young Adult Caucus, Catholic; the Rev Dr Lewis Tait Jr, Village Church DC aser Scott Wright, MDiv, Pax Christi Ambassador of Peace nungertem liasü.

## Pei linük toktsür bendanglen alir shilem 47 bo Khristantem lir

**August 21, 2024:** Alima nung pei taso lima/linük nung masü saka bendang linük balalai oa alir nisung million 280 lir aser parnok teimbaka Khristantem, Muslim nungertem aser Yihuda nungertem lir, ta Hombarnü Pew Research Center study ka ajanga metetdaksü.

"Bendangertem anüolen Europe ajanga US, Canada aser tesem balalai arur, talisa Khristantem arur," ta research agirtem rongnung tongti, Stephanie Kramer-i metetdaksü.

Alima nung nütsüng shilem 30 shi Khristantem lir aser alima nung bendang balalai oa alirtem shilem 47 bo Khristantem lir.

Kasa study ajanga, bendang balalai oa alirtem shilem 29 bo Muslim nungertem lir aser alima nung nütsüng shilem 25 Muslim nungertem lir, ta bushitet.

Alima nung nütsüng shilem 0.2 dang Yihuda nungertem lir, ajisüaka Yihuda nungertem shilem 20 bo bendang linük balalai nung oa lidar.

## ANOGO ABEN TSÜNGREM DEN

### Ne kangki apuang

*Idangji Yisui Pa nütsüngtem dang ashi, "Kari Kü sülen arunera, pai pei sasa azüokang aser pei kangki apur kü sülen arung. Mathi 16:24*

Ne kangkiji kecha mashishi na asoshi Tsüngremi mulungba lir. Kangki aputsübaji teshimetetba ka lir; ibai ne tashi dak alia masü. Na temang timtem alitsü akok mesüra tashi manga tanur alitsü akok saka ibaji kangki apuba den taitep. Tiaji mesüra ne mapa nungi adokbaji ne kangki masü. Ne kangkiji kecha taa makai tekümtet asoshi Khrista timatempa shilem agiba lir (Fil. 3:10). Pauli ashi tangar Khristan taküm nung tashi (mature) kümdaktsüba nung Pa timatempa nung pelar (Kol. 1:24).

Yisui Khrista sülen aotsü asoshi mezüngbuba pei sasa azüoktsüla. Tazüokba makai Khrista sülen anidaktsübaji tamakoktsü. Tsüngremer talangzükba atalokdaktsütsü asoshi idakji timtem kar lir. Tekümtet bener arutsü asoshi Khrista timatempa ama na meketa alirtem nem Tsüngremi tekümtet agütsütsü asoshi nai timtem kar aremzüktsüba lir. Nütsüngtemi Yisui Khrista ta mangatet tashi Yisui nütsüngtem den kangki indang mejembi (Matt. 16:21). Nai tamasa Yisui Khrista ta mangatet tashi nai kodanga kangki timtem maremzüktsü. Kodang nai Khrista den tesendaktep yangludir, Pai ne dang ne kangki sayutsü.

Kangki medeni Khristan yimsü mali. Timtem makai nai Khrista den tesendaktep akatsü atara mesüra ne mapang tajung atara, Khristaji ne taküm ta nai kodang meshitettsü. Na asoshi Tsüngremi mulungba nung kangki dena lir. Mezüngbuba, ne kangki apuang; idangji nai Pa anidaktsü.

Yamaji alima nung census aser survey 270 nung Khristantem shilem 6 aser Muslim nungertem shilem 4 pei linük nung masü saka bendang linük balalai nung lidar.

Bendang balalai oa alir shilem 4 Buddhist yimsü amangertem lir aser alima nung lir; Hindu nungertem shilem 5 bendang linük balalai nung lidar aser alima nung nütsüng shilem 15 Hindu nungertem lir.

Alima nung meimchirtemi kuli balala ajanga bendang linük balalai oa alir, aser item kuli rongnung mapa maongka, pei kibong den tanaben longjemtsü aser yimsü nung ajemdaker reshikangshi marem jena aoba kulitem densema lir.

Tang US nung nütsüng shilem 30 bo Tsüngrem dak mamangertem mesüra yimsü kecha den-a sendaktepa malirtem lir. US nung jenoka alir bendangertem nütsüng shilem 10-i dang Tsüngrem dak mamanger mesüra yimsü den sendaktepa mali.

Pew Research Center-i

ajemdaker iba report renema liasü. Kasa study nung linük mesüra territories 232 nungi bendanger 95,696 asadanga iba study agi.

Iba study nung pei taso lima toktsür bendanglen alir tanur-tain ajak asadanga liasü.

Ano pei yimsü maitsü dak sendakba nung linüktem bushia oa aliba linüktem rongnung mezüngbubaji Israel lir. Yihuda nungertem bendanger shilem 51 (million 1.5)-i Israel bushia oa alir, ano Muslim nungertem kanga sapua bushia oa aliba linükji Saudi Arabia lir.

Bendanger Khristantem aser yimsü den sendaktepa maliba bendangertem talisa US, Germany aser Russia linüktem bushia oa alir.

2020 küm tashi nung bendang linük balalai nung asor Yihuda nungertem million 1.5 tangbo Israel nung lidar. Israel bushia oa alir bendanger Yihuda nungertemji teimbaka Ukraine (170,000) aser Russia (150,000) na nungi liasü.



**AO OSHI ANGAZÜKDAK:  
TANÜ ANGAZÜKTSÜBA OJANG**



**Tamakok**

(adj) majet, takok mangu (failure)

\* Tanurtem tamakok angudang kangabo marütsütsüla.

**Tamalen**

(adj) tejaklen, taoba mapang ( earlier, front )

\* Tamalen nungi tamburtem tenla kidang tamalen amener.

**OLONG PAITEP # 6903**

1		2		3		4		5
			6		7			
8								
					9			
		10						
11								12
				13		14		
15								
16						17		

**TIPIEN**

- 1. Nüji masü - (4)
- 3. Technütsüka - (6)
- 7. Aketa shirangba - (5)
- 8. Pi - (6)
- 9. Amena - (5)
- 10. Kinü - (5)
- 11. Tanang masü - (5)
- 13. Lenmang - (6)
- 15. Nübo tedi - (5)
- 16. Tuoshi - (6)
- 17. Shiruru apuba temenatsü - (4)

**LANGTSÜNGLEN**

- 1. Jila tulu - (5)
- 2. Sarasadem dang tembang - (4)
- 4. Tarutsü indang ashirtem - (6)
- 5. Alia - (5)
- 6. Mojing - (5)
- 9. Tai inyakba metet - (5)
- 10. Medemer chijiba - (6)
- 11. Tatokba / Amadok - (5)
- 12. Anüngdang masü - (5)
- 14. Jabaso masü - (4)

**OLONG PAITEP # 6902 TELANGZÜBA**


**TIPIEN :**

- 1. Tesangra, 5. Mungo, 7. Kisen,
- 8. Salem, 12. Semki, 14. Kilem,
- 15. Kensü, 16. Sangpang.

**LANGTSÜNGLEN :**

- 1. Temesen, 2. Raksa, 3. Aon,
- 4. Aso, 6. Nile, 9. Alizüng,
- 10. Omen, 11. Lemta, 13. Ola,
- 14. Kin.

**NAI-A YA METETTER MA**



Nüngtugu football asaya Cristiano Ronaldo-i social media sabang nung pa inyakim atsülangshia YouTube nung shilem agi tenzükba sülen otsü tasen aika yanglyuogo. Bodhbarnü pai 'UR' ta nüngja agütsür YouTube channel ka tenzük aser pa indang follower tem dang subscribe button nung anemtsü ashiba sülen pa indang fan temi telangzüba tajung agüja otsü tasen yanglua liasü. Channel amenoker minute 90 tsüngda subscribers million 1 ajung, koba YouTube puti otsü nung nisung kati takaratiba subscriber timba anguba lir. Iba ocet züluba mapang tashi nungbo Ronaldo indang channel subscriber 11.2 million junger liasü.

**Assam nung ED anema longkak aitba mapang Congress worker tem yiru**



Assam nung ED anema longkak aitba mapang tangokba noksa angur.

**Guwahati, Luroi/August 22 (Agencies):**

Assam Congress tekolakba Bhupen Borah-i Brehostibarnü ashiba agi, Adani Group dak sendakba nung SEBI mendenbula anema ED-i jenjang magiba atema longkak aitba mapang Assam Congress kübok inyakertem aika yiruogo.

Pai, police-i longkak aiterem azüoktsü merangba mapang party kübok inyakertem den osangbenertem yirua liasü, ta ashi.

Borah-i X nung post ka ajanga, "Hindenburg Research report ajanga temai adokdaksüba Adani Group ken o dak sedankab nung SEBI mendenbula anema ED-i jenjang magiba atema tanü APCC-i ayongzükä Guwahati

**Assam nung ED Office meketbanger longkak aita liasü," ta ashi.**

"Iba longkak aitba sentong nung MP Rockybul Hussain aser Pradyut Bordoloi na, CLP lenir Debabrat Saikia, MLA ajak, APCC lenirtem, Department aser Frontal Organisation tem aser DCC lenirtem aser züngsem balalai shilem agia liasü."

"Ajak senteper iba longkak aitba sentong nung nisung meyrejang ishikati shilem agiogo. Anepdang 10 ako nungi tenzükä ghonda asem shi longkak aitba mapang police temi longkak aiterem nongdemtsü merang aser iba ajanga party kübok inyakertem aser osangbenertem yiruogo.

"Onoki ED dang parnok ya BJP tasa tamajung nung shilem

agir ka ama maneni inyakra, parnok ano iba amala democratic longkak aitba talila atema renema alitsüla ta t e k ü m d a n g t s ü metetdaksüogo," ta pai ashi.

Temetetsü kaji US short-seller Hindenburg Research ajanga SEBI mendenbuba Madhabi Puri Buch aser la kinungbo na aitsüogo aser ashiba agi, tenati Adani Group dak sendaka aliba offshore entities tem nung tema nung mesangdongi aliba stake tem alizüka lir.

Hindenburg whistleblower documents ajanga, Buch aser la kinungbo Dhaval Buch nati Bermuda aser Mauritius-based fund tem nung senotsü intoka lir, koba Gautam Adani teti Vinod Adani-i aziöker.

Item fund tea ya stock jenjang manipulate asütsü aser senotsü ochi meshi agitsü atema amshir ta temulung meleme bilemer.

Report ajangsa, Madhabi Buch SEBI mendenbuba asütsü atema meshim tsüngda Dhaval Buch-i investments kar pa indang kümdaksü aser iba ajanga inyakim nung meshidakba indang tasüngdangba adoker.

Hindenburg-isa, SEBI tekolakba item fund tem den sendaktepa aliba ajanga regulator-i Adani Group sadem sadema inyaktsü atema lenmang lapoktsüba ya rasa ashi asütsü, ta ashi.

**Tripura tzümetsüng: NDRF team aser resource talila yokogo**

**Agartala, Luroi/August 22 (Agencies):**

August 19 nü nungi tzünglu kanga sashia aruba ajanga Tripura nung tzümetsüng lendong ataloker aliba mesemtsü atema Centre sorkari resources talila yokogo.

Resources tem rongnung helicopter, rong, aser National Disaster Response Force (NDRF) team tem densema lir aser parnoki teyari agütsüba aser tekümsükba maparen balala nung teyari agütsütsü.

Tzümetsüng lendong nung tang tashi nung nisung 10 süogo aser nisung 34,000 dak tema state kübok tesem balala nung amenoker aliba relief camp 300 dak tema nung jenoker lir.

Union Home Minister Amit Shah-i X ajanga, pai tzümetsüng lendong dak sendakba nung Tripura Chief Minister Manik Saha den sensaksemogo ta ashi.

Lendong timtem ataloker aliba mapang Centre-i state takokba tashi nongita yaritsü ta pai tenangzükba agütsüogo.

"Ni CM Tripura, @DrManikSaha2 den



Tripura tzümetsüng

sensaksema state nung tzümetsüng tensa asadangogo. Centre-i local tem nem teyari agütsütsü atema NDRF team, helicopter aser rongtem yoktsü. Timtem lendong ataloker aliba mapang külem adianu aser adianutsürtem den Modi sorkar nokdaka lir," ta Shah-i ashi.

Chief Minister Saha-ia, X ajanga state nung tang timtem lendong ataloker aliba indang lemsatper aser Centre sorkari teyari agütsüba atema pelaba lemsatepa liasü.

Paisa, Assam aser Arunachal Pradesh nungi NDRF team 11 state-i yoktsü aser iba den tzü agi metsünger

aliba tesemtem nungi nüburtem anintsü atema chopper tem anepalutsütsü ta ashi.

Maneni pai, tekümsükba maparen takaratiba nung inyaktsü atema tekümsükba maparen balala benoka inyakba team tem den rong talila dena yoktsü ta shisem.

Saha-isa, state indang machinery temi anibelem mesasai tanen makai inyakba aser timtem lendong ataloker aliba mapang nübur lenirtem, social worker tem aser lisopurtemi sorkar den teka amteper inyakba atema kanga pelaba lemsatepa liasü.

**Manipur nung tetsür ka densema telungpur ana apu**

**Imphal, Luroi/August 22 (Agencies):**

State aser central security force temi Manipur kübok Imphal East district meita aoba mapang tetsür ka densema Kangleipak Communist Party (KCP) telungpur züngsem asütsü ta bilemba nisung ana apu aser pur orr aliba nisung ka kümsükba liasü

Itangitertem osang dak

ajemdaker security force temi Bodhbarnü Sawombung nung temulung meleme bilemba tesem ka meita oa liasü.

Telungpurtemi pur or aliba nisung ka kümsükogo, ajisiüka telungpurtemi aika mepushi-i jendakja liasü.

Sepaitemi apuba telungpur ana ya Maibam Priya Devi (31) aser Konjengbam Narendra (31) ta jangjaogo.

Kasa mapang nung nisung pur aoba nung amshi asütsü ta temulung meleme bilemba gari ka dena puogo.

Ken o maneni bushisüngdangtsü atema security force temi apuba nisung ana aser gari ya Manipur police nem bendanga agütsüogo. Telungpurtemi pur or aliba nisung indang maitsü memetetdaksü.



# Tim Walz-i Democratic VP nomination agizükogo



**Chicago, Luroi/August 22 (Agencies):** Tim Walz-i Democratic Party nungi vice presidential candidate asütsü nomination Bodhbarnü agizükogo.

“United States indang vice president atema nenok nomination agizüksü ya kü takum nung konang tulutiba lir. Yangi alir asenok ajak ya tebour tajung kuli ka asoshi dang lir. Asenoki iba linük meimer,” ta Walz-i Chicago nung Democratic National Convention nung ashi.

Brehostibar aonung Kamala Harris-i party nungi US tir atema tokteptsü nomination magizükdang taoba mapang school tesayur, National Guard sepa inyaka alisang aser tang Minnesota governor Walz-i pa indang takum otsü shia o jemi

tenzük.

Iba sentong nungya taoba US tir Bill Clinton-ia telok den jembidang Harris-i nübu tajung ka shimogo ta shia liasü.

“Nenoki iba team asoshi vota agüja shimtetra, nenok arishi tepiyong nenok nüma tanga alitsü,” ta Clinton-i ashi.

Hombarnü iba mungdang nung Biden-i jembidang pa indang tatong tir Kamala Harris yaritsü ayongzükba sülen Mongulbar aonung taoba US tir Barack Obama aser pa kinungtsü Michelle nati jembia liasü.

Biden-i Hombarnü iba mungdang nung jembiba sülen Chicago yutsür California bushia ogo, kong pai Bodhbarnü Israel Ato Kilonser Benjamin Netanyahu dang Gaza nung ceasefire alitsü

asoshi ajungshia liasü.

Middle East nung tensa tajungba kumdaktsütsü mechi US Secretary of State Antony Blinken-i iba region sema jajaba tembangba sülen US aser Israel lenir ghonda aika phone ajanga jembia liasü.

“Asenoki ceasefire bener arua pua alirtem chiochtsü aser tanungba tetsükdaktsütem agientsü asoshi Cairo nung jembishinü akatsüla ta ni jangja-jangja shiogo,” ta Biden-i social media X nung sangdong ka agütsü.

Külen Chicago nung arishi küm 60 tain Walz-i jila tila Nebraska nung pa soa inetba, alu inyakba, military service tenzükba aser tesayur ama inyaker yimtenren nung tetsüng ajemokba indang jembia liasü.

Arishi küm 59 tain Harris aser Walz tsungta tesendaktep tajung aliba aser rally balala nung tenati nüburtem mulungjang nung kongshiba ajanga parnoki November ita arishi küm 78 tain Trump akoktsü südi ta teimla lir.

Polls balala agitepba nung tepila kangabo mali, saka Harris jenjang tajungba lir. Ita ka jakdang Biden dang Trump jenjang tajungba liasü.

# Ukraine-i Kursk region amak, Russia mitkar nübu agi anünger

**Kyiv, Luroi/August 22 (Agencies):** Ukraine-i ajungbena Russia indang Kursk region nung hopta tanabuba amakdang Moscow-i sepa tali yoksemba agia menokdangtet, anungji Kremlin-i Russia kumzükä ayutsü atema battalions tali yoksemtsü asü rara nung nübu tasen shimoktsü ta mangmanger.

Moscow-i mapang shia armed forces nung nübu tasen melentepa anioker aser Ukraine den raratsü atema contract nung aliba sepaitem dang yoker. Ajisüaka Kursk amakba ajanga yimten yimsüsürtem tekolok atsüker.

Russia-i Ukraine amak tenzükba mapang conscripts tem yokba ajanga yimtenren nung timtem ajurutsü ta Tir Vladimir Putin-i angateta liasü.

“Tongpang nung conscript sepaitem shilem magidaktsütsü meranger. Reservists atema nübu tali meshimtsü,” ta Putin-i March 2022 nung television ajanga shia liasü.

Pai conscripts tem arütsü leni yoka Federal Security Service (FSB) nem parnok tenüng zülüok temelaba agütsü.

Ukraine-i arütsü alema aita Kursk region amak tenzükba anogo pezü sülen August 10 nü Russia nung tanur tetsü temi parnok jabaso tem active combat nung lir ta ashishitepa liasü.

“Kursk region nung alir conscript ka tetsü Oksana Deeva-i conscripts tem combat

zones nungi meyiba shilangdaktsütsü atema petition ka adoka liasü. Iba petition nungya anogo asem tsungta nisung meyririjang asem dak temai meyonngem agütsü,” ta independent Russian news publication Okno ajanga ashi.

Hombarnü Chechen special forces volunteer battalion, Akhmat commander kati iba petition ya aija liasü.

“Asütsü tiaja malirtembo shingaa masütsü, saka na Russia asoshi nokdakba mapang süra, aser nai Tsüngrem dak amanga lira na kotaki aotsü,” ta Apty Alaudinov-i television ajanga ashi.

Iba ken o nung Putin ola madoki lir.

Sepaitem tetsü indang lokti tentet ya Russia nung yimtenren tsütsü tashi lir, ta Institute for the Study of War ajanga ashir.

“Tesüba mapanga tetsütem lokti tentet yagi Russian social movements tenzükta liasü, aser Committee of Soldiers’ Mothers (mapang tatsüla lir Union of Committees of Soldiers’ Mothers ta melen) yagi 1980s tatemlen aser 1990s tetenzüklen Soviet conscripts anema rally ayongzük aser takok ngua Soviet military nung ochishia inyaksangshitsü ayongzükta liasü.

Ukraine amak tenzükdang Putin-i conscripts kinungertem dang iba rara nung ‘professional soldiers’ temi

tongti shilem agitsü ta shia liasü. Ajisüaka special forces aser danga sepa unit tem asüamar tali akumba ajanga Putin-i mapa tamajung inyakba nung aija tepuokdak yua alirtem nem tatok agütsü, immigrants nem par linük nung alitsü temelaba agütsü aser Ukraine nung raraba asoshi temelen taa tajung agütsütsüsa akum.

Ukrainian commander-in-chief Oleksandr Syrskiy-i ashiba agi, Mongulbarnü tashinung Ukraine-i Russia telung nung kilometre 35 shi oa 1,293 square kilometres (500 square miles) amokbangogo. Hopta ka jakdang alinük 1,000sq km (386sq miles) aser nisung aliba tesem 93 amokbanga liasü.

Kursk nung Ukraine sepaitem ya kilometre 28 telungi aitogo aser lenden kilometre 56 shi nung lir ta ISW ajanga Honibarnü asadangteta liasü.

Russian sepaitemia küm tenzükba Ukraine nung lentsü 1,175sq km. (454sq miles) agiogo, ta ISW ajangasa ashi.

Iba ya shidak asünungbo, Russia-i ita ti nung Ukraine li rakzükba dang nungi Ukraine-i hopta ka tsungta Russian li rakzükba ya tuluba alitsü.

Taoba hopta Ukraine sepaitemi Russian settlements 19 amokbangtetba ya Russian sepaitemi Ukraine anüdoklen tang tashi rara aliba den medem dangtsü makok.

(Maneni tapak 8 nung...)

# Dimapur Longsa Metsübo Kidong Telongjem-i tenüngsang agütsür

**Wb. T. Opanglemba Ao (AFI), S/o. Lt. Tsüknungtemjen Jamir-i August 15, 2024 nü 78th Independence Day amongba mapang Department of Fisheries & Aquatic Resources mapa nung nendaka aser bendanga agüja sorkar mapa tenzükba reprangteta Peren District nungi District Award nguteta Longsa Metsübo Kidong nem konang-nüngsang bener arutsüba atema tenüngsang tetushi agütsür aser pelaba lemsateper.**

Maneni nü taküm aser wadang ajak nung Tsüngrem lenisüba denang ta sarasademtsür.



Sd/- Aosunep Secretary

Sd/- Temjennungsang Jamir Convener

# SODANGCHANG SEMCHIRTEMI TENÜNGSANG AGÜTSÜR



**Wb. & Wt. Karimeren (Mopungchuket) jabaso Wb. Temjen Aier-i August 15, 2024 nü Department of Arts; Painting nung Governor’s Award nguteta tebou semchirtem nem konang-nüngsang bener arutsüba atema tenüngsang tetoshi agütsür.**

Tarutsü mapang nunga maneni pa sempettem, pa wadangnung takokba südakjangma ta teyanglur Tsüngrem dang sarasademtsür.

Sd/- Secretary Sodangchang Semchirtem Telungjem

# SANGDONGER

Asür T. Masalepden (Unger) tenüng nung, pa dang sen apua alirtem dang par kinungertemi sentsü ajak atoker.

# Sri Lanka tir menden atema tokteptsü nisung pezü lir

**Colombo, Luroi/August 22 (Agencies):** Sri Lanka indang tir menden asoshi tokteper par pezüprong – Sajith Premadasa, tang teinyakdak Tir Ranil Wickremesinghe, Anura Kumara Dissanayak aser Namal Rajapaksa – tia dak dang metaloka lir. Sri Lanka nung tesüba mapang kibong ishikati yimten amokbanger liasü aser tesüba mapang parnok ajak tesendaktep lir, kar tembar, kar tsükchir aser kar külem tenzükba.

Par pezü rongnung arishi küm 75 tain Ranil Wickremesinghe ya arishi küm nunga aser yimtenren nunga tambosang lir. Namal Rajapaksa ya arishi küm 38 aser tanubosang lir.

1977 küm mezüngbuba Parliament election akoksang Ranil ya Sri Lanka yimtenren nung tongti nisung ka liasü. Pa pezüben ato kilonser inyakdanga lir aser tir-a inyakdangogo. Küm ana tsungta pai Indian Ocean nung asetkong linük rongsenketzung jenjang ajungba kumdakjaka tashi kangabo mait. Danga linük ka nung asübo pai alemli takok ngur lila, saka Sri Lanka ya balaka lir.

Ranil den tokteper tejangja

nübu ana lir – leader of opposition aser mapang ka pa indang deputy inyaka alisang Sajith Premadasa aser ultra-Marxist party Janatha Vimukthi Peramuna (JVP) lenir Anura Kumara Dissanayaka.

Anu menur süaka ajungbena Namal Rajapaksa aita ajanga Sri Lanka indang puti otsü nung tir asoshi tokteperba tali tepenjaba kumdaktsür.

Ajisüaka aikati tang par pezü tokteperba aliba ya ana dang anüngtsü amai ajiteter.

Ajisüaka kanga mejungi telemsa adoker aliba asetkong linük nung kanga sashia tokteptsü.

September 21 nü nisung million 17-i vote agütsüngdang Sajith aser Anura Kumara Dissanayaka dang anünga alitsü südi ta ashir. Kari Sajith aser Ranil na ang tatem tashi tokteptsü ama ajiteter.

Ranil ya mela-mela tsükdaktsütsü nübu ka masü. Pa 2015 aser 2020 tsungta ato kilonser inyakdang sen billion aika jenjang mapa tamajung inyak ta tai tonglokja lir. Aji masüdang pa cabinet menden nun glia JVP guerrillas samatsütsü asoshi government-hit squad ka pai anishia liasü ta tai tonglokja lir.



## India team 2025 kum England nung oa Test 5 asayatsü

Luroi/August 22, 2024 (Agencies): Board of Control for Cricket in India (BCCI)-i Brehostibarnü sangdong ka ajanga, India cricket team 2025 kum June 20 nungi August 4 nü tashi England nung oa Test pongu asayatsü, ta metetdaksüogo.

Mezüngbuba Test asaya Headingley, Leeds nung June 20 nungi 24 tashi asayatsü, iba sülen tanabuba Test Edgbaston, Birmingham (2-6 July), tasembuba Lord's (10-14 July), pezübuba Old Trafford, Manchester (July 23-27) aser pongububa Oval (July 31-August 4) nung asayatsü.

Board of Control for Cricket in India (BCCI)-i asayatem indang mapanglem X ajanga metetdakja liasü.

2007 kum Rahul Dravid

captain asüba mapang India team-i England team par linük nung akokba sülen tang tashi nung khen danga koka mali. Iba asayamung ya ICC World Test Championship 2025-27 cycle nung ajaki kanga yongya ataba asayamung ka asütsü.

Virat Kohli lenisüba nung India team 2021 kum August aser September ita Test pezü asaya aser iba asayamung nung parnok 2-1 agi tejekdang liasü.

Ajisüaka COVID-19 wara poktetba ajanga iba asayamung nung tatembangbuba asaya 2022 kum July ita asayatsüsa aküm, koba Jasprit Bumrah lenisüba nung asaya. Edgbaston nung tatembangbuba Test asaya ya India-i wicket 7 agi makok aser asayamung 2-2 nung

tembanga England nung Test asayamung ka akoktsü maongka aliba magitet.

India aser England na tatemmsa India nung asayaba mapang England-i asayamung 1-4 agi makok. Iba asayamung nung captain Rohit Sharma, opener Yashasvi Jaiswal, spinners Ravindra Jadeja aser Ravichandran Ashwin nungeri kanga junga asaya liasü.

England nunger swing bowler tem nem tajangzük agütsüsü atema England and Wales Cricket Board (ECB)-i tesemtem shimogo.

Asayatem nem anisüngzük agütsüsü atema mezüngbuba aser tanabuba Test asaya tsüngda hopta ka break lir aser tasembuba aser pezübuba Test asaya tsüngda-a anogo ti break lir.

## Taoba India fielding coach R Sridhar Afghanistan assistant coach kumogo



Luroi/August 22, 2024 (Agencies): Afghanistan Cricket Board-i taoba India fielding coach R Sridhar, Afghanistan tebur national team New Zealand aser South Africa den asayatsü aliba asayamung atema assistant coach asütsü shimogo.

"New Zealand den test ka aser South Africa den ODI asaya asem atema Afghanistan Cricket Board-i assistant coach asütsü Sridhar shimogo. Sridhar-i iba shilem kanga junga agia tarutsü nung pa den mapang talangka atema tenangzüktepba yanglutsü imla atar," ta board-i ashi.

Sridhar, shiba Hyderabad nungi first-class asaya 35 aser List A asaya 15 asayaogo, pa 2014 nungi 2021 tashi Indian coaching staff nung densema liasü. 2021 kum November ita Rahul Dravid-i head coach mapa agizükba sülen pa T Dilip-i melena liasü.

Afghanistan tebur team September ita New Zealand den Test asaya ka aser South Africa den ODI asaya asem asayatsü lir. Afghanistan team-i tawa kanga junga asaya arudar.

Rashid Khan-i anir, Afghanistan team-i otsüsüsüsa 2024 T20 World Cup nung semifinal tonga liasü. Iba asayamung nung parnoki New Zealand aser Australia amala team tajungtem koka liasü.

Taoba kum India nung ODI World Cup asayaba mapanga parnoki England, Pakistan aser Sri Lanka team koka liasü.

Taoba mapang England nunger batter Jonathan Trott-i coach mapa agizükba sülen bendanger coach team shimba nung Sridhar ya tesüsubaba asütsü. ODI World Cup atema Afghanistan-i team mentor asütsü Ajay Jadeja shim. Kasaji T20 World Cup, atema Dwayne Bravo bowling consultant liasü.

## German goalkeeper Neuer international asaya nungi anenogo



Luroi/August 22, 2024 (Agencies): Germany nunger World Cup koker aliba goalkeeper Manuel Neuer-i Bodhbarnü sangdong ka ajanga pa international football asaya nungi anenba sangdongogo.

Arishi kum 38 tain asayar ya Germany team nungi 124 ben asayaogo aser asaya 61 nung pa team captain liasü. 2014 kum Germany team-i World Cup

akokba mapang pai tongtibang shilem agia liasü.

Neuer tatemmsa linük team tenüng nungi Euro 2024 nung asaya liasü. Iba asayamung ya Germany nung ayongzükba asaya aser parnok quarter final nung Spain-i tsükdakja liasü.

Neuer-i pa asaya nungi anentsü atema telemetba agiba Instagram ajanga sangdonga liasü. "Temeim fan tem aser

football Germany, kum 15 aser national team nungi asaya 124 nung asayaba sülen German national football team nungi kü indang career tanü tembanger," ta Neuer-i zülutsü.


"Shirnoki ni meteta lir parnoki ni telemetba pongpa pongpa magir ta meteta lir. Ozü kibong aser medemertem den mapang talangka sensak asema sülen ni National team nungi anentsü atema tang mapang shitak ta bilema iba telemetba agiogo," ta paisa ashi.

"Ni asayaba mapang lepa reprangdangra ni kanga nema adanger aser tenüngsang agi sünga lir.

"Kum 7 aser asaya 61 tashi German national team anir asayatsü atema kü nem maongka agütsü aser iba atema ni teti pelar," ta pai shisem.

Neuer mezüng Schalke nungi asaya tenzük aser 2011 kum Bayern Munich-i oa aser pa iba club nungi tang tashi asayadar.

## Fulham-i Burnley midfielder Berge alizükogo



Luroi/August 22, 2024 (Agencies): Fulham-i Burnley indang midfielder Sander Berge pound million 25 agi alizükogo.

Norway nunger international asayar yagi Fulham den kum pongu atema

tenangzüktepba yangluogo, aser ano pa den ita 12 atema tenangzüktepba yanglutsü lenmang sadema lapoka yuogo.

Fulham-i mezüng pound million 20 agütsüsü aser iba sülen add-ons pound million 5 agütsüsü.

Arishi kum 26 tain asayar ya 2023 kum Burnley nungi Sheffield United nung oa aden aser pa nem Claret's player of the year naroküm agüja liasü.

"Ni kanga pelar," ta Berge-i ashi.

"Taoba hopta ishika atsütepa aruogo, saka ni tang iba tebur tajung stadium nung club tola semer mena lir aser kü tarutsü idaki lir ta meteta ni

kanga jangradema bilemer," ta pai ashi.

Tang transfer window nung Fulham puri asayar pezü alizükba nung pa tatemsabuba lir. Parnoki Emile Smith Rowe, Jorge Cuenca aser Ryan Sessegnon nunger alizükogo.

Berge, shibai taoba season Burnley nungi asaya 37 nung asayaogo, pa season tasenba nung Burnley pur asaya anaprongla nung maniok.

Maneni pa Norway team nungia 46 ben asayar lir.

Fulham pur August 24 Leicester City den asayatsü lir, koba Premier League season tasenba nung kidang mezüngbuba asaya asütsü.

## BENDANGLI OSANG : Tapak 7 nungi...

### Ukraine-i Kursk region amak...

Tesüiba hopta nung Russia asoshi takok tulutibaji parnoki February ita rakzükba jila Avdiivka anüolen tsütsü alitsü. Parnoki iba jila nungi anüolen kilometre 30 shi rakzüketogogo.

Russian sepaitemi ano anüolen kilometre 16 telungi yir Pokrovsk rakzüktsü nükjidong lir südi ta amanger. Parnoki taoba mapang Zavitne aser Novozhelanne rakzük aser ano settlements trok shi amokbangtetogogo ta ashi, saka ibai tejangja masü.

Ajisüaka Ukraine takok ya tuluba lir, kechiaser parnoki Russia litsü nung kisüng masü saka par litsü nunga tongpang sashia raraba tesem aika tanaben agitetogogo.

Russia-i frontlines aser Ukraine nung yimtitem

amaktsü atema Iran-i yangluba Shahed drones tem amshia arur aser tawa nungi Ukraine tasa ajizükba itdangitertsü atema first-person view (FPV) drones tila amshir.

US-i anir anüolen tembar linüktem nungi Ukraine mitkar nem teyari agütsüba drones aser missiles amala ya arütsü alema oa mamshitsü tenokdangba dena lir.

Ajisüaka Ukraine-i Kursk forces nem US hadir amshidaktsür ta ashi aser iba mapang parnoki apu raksatsüsü atema cluster bombs aser missiles tem amshia Bodhbarnü tashinung Kursk region nung Seym

ayong ajanga senzüba apu asem raksatsüogogo ta ashir.

## BILEMDANGANG

"Tenüngsang agütsüba agi mapa tilatiba-a tebor jungdaktsür."